

△^{庚三}治諂曲障二。^{辛一}標章。^{辛二}舉經。^{辛三}釋義。今初

次說第三障對治。

△^{辛二}舉經。

經曰。汝等比丘。諂曲之心。與道相違。是故宜應質直其心。當知諂曲但為欺誑。入道之人。則無是處。是故汝等。宜當端心。以質直為本。

△^{辛三}釋義二。^{壬一}明遠離諂曲。^{壬二}釋誠勸。初中三。^{癸一}釋障法。^{癸二}釋對治。^{癸三}釋不相應。今初

論曰。第三障對治者。示現根本直心。遠離諂曲煩惱障故。於身口意中。自違彼故。如經。汝等比丘。諂曲之心。與道相違故。

三治諂曲。明遠離中。初科。初總示根本直心者。以能出生道心。故名根本。於下牒釋。凡愚自昧。三業動用。還欺自心。足恭面柔。是身諂。巧言令詞。是口諂。方便計校。是意諂。三皆邪曲。而本於意故。但云心自違彼者。彼即是道。道非邪曲。故與相違。

△^{癸二}釋對治。

復示違道障對治故。如經。是故宜應質直其心故。

次科違道障即諂曲也。對治謂質直也。質故無諂。直故無曲。

△^{癸三}釋不相應。

又復相違法。道分時中不應有故。如經。當知諂曲。但為欺誑。入道之人。則無是處故。是中欺誑者。心口俱時不實用故。

三中諂誑違道。名相違法。道唯質直。不應諂曲。對經可知。是下點示。諂通三業。必起於心。多由於口。故云心口不實也。

△^{壬三}釋誠勸。

餘者示現。直心是道心本故。如經。是故汝等。宜當端心。以質直為本故。

次釋誠勸。指後經文。故言餘者。道心由直心而生。故直心為道心之本。楞嚴云。十方如來。同一道故。出離生死。皆以直心。淨名云。直心是道場。今云端心者。此勸攝之令正。然後三業動用。皆須質直。

△^{丙三}修習出世間大人功德分二。_{丁一}總標。_{丁二}隨釋。

今初

已說修習世間功德分。次說修習出世間大人功德分。大人功德分有八種。一切大人。常用

此以自覺察故。長養成就方便畢竟故。

第三分總標中。結前生後可知。一切大人。即目菩薩。以揀二乘。教雖在小。論取深意。例判大行。又據首標。建立菩薩所修行法。則一經始末。悉大人行。豈唯此分乎。孤山云。三乘聖人。悉曰大人者。誤也。即前所謂。大道心眾生。亦云大士。士即是人。譯語小異。安有小聖。反名大耶。八大人覺經云。如此八事。乃是諸佛菩薩大人之所覺悟。非唯此經。一切經論。凡標大人。皆為揀小。學者宜知。常用覺察。勤修習故。長養成就。不退失故。長養方便是因。即前七段成就。畢竟是果。即第八段。如第七段結文自見。

△_{丁二}隨釋八。_{戊一}無求功德。_{戊二}知覺功德。_{戊三}遠離功德。_{戊四}不疲倦功德。_{戊五}不忘念功德。_{戊六}禪定功德。_{戊七}智慧功德。_{戊八}畢竟功德。初中二。_{己一}舉經。_{己二}釋義。今初

經曰。汝等比丘。當知多欲之人。多求利故。苦惱亦多。少欲之人。無求無欲。則無此患。直爾少欲。尚宜修習。何況少欲能生諸功德。少欲之人。則無諂曲以求人意。亦復不為諸根所牽。行少欲者。心則坦然。無所憂畏。觸事有餘。常無不足。有少欲者。則有涅槃。是名少欲。

△_{己二}釋義二。_{庚一}總示。_{庚二}別釋。今初